

truckt vnd sonderlich in der Tauff Christi / da die
drey Persohnen vnderschiedtlich angezeiget sind/
vnd im Spruch von vnser Tauff: ihr sollet sie
teuffen im Nahmen des Vatters / Sohns / vnd
heiligen Geistes / Item in Symbolis.

Man sol auch vnterrecht thū vnd hören / was
der Verstandt sey in diesem Wort / Persona / nemb-
lich das nicht erticht ist / vnd ist nicht ein todter
gedanck / ist auch nicht ein zufellig wandelbar
ding / das an einem andern wesen klebt / vnd ist
nicht ein Stück oder zertrenlich ding / sondern ist
etwas wesentlich / lebendig / nicht in vielen / sondern
vnterschieden / einig vnd vernünfftig / wirdt auch
nicht getragen vnd erhalten von einem andern
mit vereinigten wesen / Als du bist eine Person /
aber dein leib allein ist nicht ein Person. Dann
er wirdt getragen von einer edlern Natur / nemb-
lich / von der Seele / vnd so die Seele ab-
scheidet / so zerfelleet der Leib vnd
verfaulet.